



Nallunairutii Allgiliyaulriim Atauwaulriim

Metropolitan Tikhon-am

Pascha 2016

Ayagluni Takarnarqellrianun Allgiliyanun, Atkumalrianun Agayulirtenun, Managganun, Elluarrluteng Qaunqistenun, cali tamalkuita ilakutellrianun Orthodox-aat Agayuviatni America-mi:

KRISTUSSAQ UNGUIRTUQ! ILUMUN UNGUIRTUQ!

Ciuniuramci, kenkekngamni angelgutemni, angnirnaqpialriami tanqilriami Agayunerpagmi Kristuussam Unguillrani. Ernerpak maktukut akertem pit'ellrani "taitnaluku Ataneq nanrautmek, myrrh-amek pivkenaku," cali tangernaluku Kristuussaq, "Akertii Elluarnerem, Ercecilria tanqigmek tamalkuitnun" (Paaskaam Canon-aara).

Ernerpak, uitukut angnirluta nutaramun cali pakemkumiutarmun piciucimun. Ernerpak, yuucirput ayagturtuq akvauvacet'un imumek neryuniuruterluta Atanemteni cali Anirturtemteni Iissuss Kristuussami, taugaam pika'aniumaluta anernekun cali piyumiutekun, ilungevkaumaluta unguvakun cikiutiikun Atanrem, kemegkun Taillerkun wangkutnun, naluumallerkun Kelistamun, atrallerkun qungumun, makcimallerkun erenret pingayuatni, cali mayuumallerkun qilagmun yuicingqesqelluta amllenrulriamek-llu pingqesqelluta (John 10:10).

Nallunritaput, imkut pistengulriit Qaneryarakegtarmun, kelgumallrat cikiutekumalriit ellaitnun piyugnallerteng atu'ulallerkaatnun, tuaten-llu wangkuta atauciqaauqaqluta akurtullerni tamakunek qanerniarutekciqaput atullrit cikiumalriit wangkutnun. Cikiutet makut: pinqecciyaraq, kenkiyaraq, elluangnaqsaraq cali pillaganricaraq, wall'u assirluni cali ukverluni angayuqauyaraq, mikelnguyaraq, wall'u anelgutnguyaraq, makut cikiutet ur'arkaugut Kristuussam tuqullrakun cali unguillrakun, piyunarqucilarluta ataam teguyugngarivkarluku cikiun unguva nangyuilnguq tuaten nunamiutarkun cakviungramta.

Ukaqvani allrakuni niitelallrukut yuucit ellmikuunritniluki. Man'a nutaraunrilengraan, imkunun taugaam ernerpak nunaniryutekilrianun unguvam piunrullranek tuqumi, wangkuta ataam umyuqaqnarpaput tauna unguva Kristuussam tunyumakii wangkutnun ernerpak tunyumaa cali tamalkuitnun yugnun. Tuamta-llu cikiutnguuq wangkuta qanerniarutkarkauluku. Arcaqertuq qaillun wangkuta atulput tauna amllellria unguva cikiumalria wangkutnun Kelistakun cali Unguilrakun, cali qaillun cucukellerput yuyaraq ell'aramteggun wall'u yuullerkaq amllellriamek yuucimek uryurluni kenkamek, naklekutmek cali takumcukutmek.

Ernerpak imiumaukut angnimek, nepaunani cali avaurilkinaqluni. Taumi-llu angqapiaralriamek atu'urkangqertukut, una angelria angnirnaq cali amllellria yuuciq cikilillerkarput ellarpak avatemteni. Kelistakun, caskarput uryurtuq unguvamek (Psalm 23:5), pitalkellriamek yuucimek

cikiliryugngakemtenek tamalkuitnun avatemteni; pitalkellriamek kenkamek imiryugngaluki imkut kiimetellriit alingelriit-llu; pitalkellriamek naklekutmek cali uitanqegcitmek cikiryugngaluki carrarmek angnimek imkut nangteqelriit.

Cakneq piyumiutekaqa tamarpeci tunesqelluku una Paaskaam angniutii irniavcenun, laqlirpecenun, tamalkuitnun ilavcenun cali nunavcenun, cali-llu imkunun nallunriqsailngurnun una Paaskaaq, Orthodox-aat Agayuviatni, “agayunerpagni Agayunerpauguq, anagkengyarani Anagkengyarauq, tuani nanrarnauput Kristuussaq akwarpak.”

A handwritten signature in black ink, appearing to read "Tikhon". It consists of a stylized 'T' followed by a more fluid, cursive script.

† TIKHON
Allgiliyaulria Washington-aami
Metropolitan-aarulria tamalkuan America-mi Canada-mi-llu